

✓ МУЖДА



УЮШМА КУТУБХОНАСИГА ТУҲФА

Ўзбекистон Журналистлар уюшмасига устоз журналист, таниқли адиб Маматкул Ҳазратқулов ташриф буюриб, Уюшма кутубхонасига ўзининг “Қизил ва яшил”, “Қирғоқсиз дарёлар” ҳамда “Варақсиз дафтар” номли китобларини туҳфа қилди.

“Қизил ва яшил” номли қисса ва ҳикоялар тўпламида ёзувчининг узоқ йиллар давомида ёзилган асарларидан намуналар саралаб чоп этилган. “Қирғоқсиз дарёлар” китобида адабиётимиз ва санъатимизнинг дарғалари ҳаёти ва ижоди, хулқининг ибратли жиҳатлари ҳақидаги эсселар ўрин олган.

Маматкул Ҳазратқуловнинг “Варақсиз дафтар” бадиий публицистик асарида эса мамлакатимизда амалга оширилаётган кенг қўламли ислохотлар самаралари қаламга олинади.

Кенг китобхонлар оммасига мўлжалланган мазкур китоблар журналистика бўйича таълим олаётган ёшлар учун муҳим қўлланма вазифасини ўтайди, дейиш мумкин.

Айтиш жоизки, Ўзбекистон Журналистлар уюшмасининг кутубхонаси бугунга келиб энг сара, энг ўқишли китоблар билан бойиб бормоқда.

Ўзбекистон Журналистлар уюшмаси
Ахборот хизмати.

✓ ТААССУФ

НА ТАРТИБ БОР, НА ИНСОФ...

ёки Тошкент шаҳридаги ўз уйида бегона бекатлар ҳақида



“Кўкча дарвоза” кўчасидаги дов-дарахтлар кескин камайиб бораётгани оқибатида экологик вазият ночорлиги хусусида аввал ҳам газета-мизда танқидий мақолалар берилган. Айниқса, Учтепа тумани ҳудудидаги шаҳарсозлик меъ-ёрларига амал қилинмай, экологияга тузатиб бўлмас даражада зиён етказилиб, пала-партиш қурилган савдо ва маиший хизмат кўрсатиш, автомобилларни тузатиш ва ювиш, ресторан ва умумий овқатланиш шохобчалари ҳақида айтиб ўтилган эди. “Экологлар қачон уйғонади?” деб бонг урилганди. Аммо, пойтахт ҳокимиятидагилар газетада чиққан танқидий чиқишларга ҳануз бепарволар. Қонунда белгиланган муддатларда тахририятимизга жавоб ҳам берилмади.

Хабарингиз бор, Учтепа туманидаги маҳалла ҳоким ёрдамчиларидан бири 30 минг АҚШ доллари миқдорига пора олаётганда қўлга тушганди. У автобус бекатларида савдо дўконлари қуришга юқорида ишлайдиган танишлари орқали рухсат олиб бериш эвазига шунча миқдордаги маблағни олмоқчи бўлган.

Тошкентдаги бекатлардан коррупциянинг ҳиди келиб турганга ўхшайди.

“Кўкча дарвоза” кўчасида “Хондамир” бекати. Савдо дўконлари йўлагига иккита ўтиргич қўйилган, холос. Қорми, ёмғирми, автобус кутаётган йўловчилар ташқарида туришга мажбур.

Бекатдаги одамлар ноқулай бўлса-да, сабр қи-

лишади. Ҳозир одамлар дўкондорга бир нима деб танбех бергандан кўра, виждонига ҳавола қилишни афзал билишади. Дўкондорнинг эса виждони қийналмайди. Масалан, 7 мартда кун бўйи ёмғир ёғди, ёмғир аралаш қор ҳам. Одамлар шу об-ҳавода автобус кутишаётди. Дўкондорга нима ҳам, одамлар совуқда, ёмғирда қоладими, савдо бўлса бўлди-да. Бекат учун ажратилган ҳудудни эгаллаб олиб, элу халққа ноқулайлик туғдираётганини ўйлармиди?!

Шу кўчадан шаҳар амалдорлари ҳам, Учтепа ҳокими ҳам, прокурори ҳам ўтар, аммо улар автобус кутаётган бечораҳол йўловчиларга назар ташлайдими? Балки, ойнаси қорайтирилган автомашиналардан ташқари бошқача кўринар?

Ўтиргич ҳўл бўлиб ётибди. Хондамир бекатида шаҳар ичидаги 35-, 53-, 87-, 73- ва бошқа йўналишларда қатновчи автобуслар тўхтаб ўтиши белгиланган. Эрталабки тигиз пайтида ўнлаб йўловчилар бекат атрофида тик туришади.

Бекатларнинг эгаси ким, бекатлар йўловчи учунми ёки савдо шохобчалари учунми?

“Кўкча дарвоза”нинг Шофайзи фуқаролар йиғини рўпарасидаги “Беҳзод кўчаси” бекатида ҳам аҳвол шундай. Суянчиги ҳам йўқ, уч киши аранг сиғадиган битта ўриндиқ бор, холос. Бир томони гўшт дўкони, яна бир томони дўконлар... Бекат ортида иккита ўриндиқ чанг босиб ётибди.

Эсиз, “Кўкча дарвоза” кўчасининг аввалги файзи қолмади. Қилган ишларидан бекат “эгалари” уялмайди. Дўкондорлар ва тадбиркорларнинг бекатлар

билан боғлиқ ҳужжатлари тегишли идораларда обдан ўрганилиши зарур.

Шаҳарнинг марказий кўчаларидан андоза олиб, ушбу кўчадаги автобус бекатларини тартибга келтирса бўларди. Тошкентнинг “Кўкча дарвоза”си шаҳарга ўғай эмас-ку! Хуллас, ҳар қадамда қаровсизлик, ҳар қадамда қонунбузарлик.

Катта-катта дарахтлар қуриб ўтин бўлаётди. Чинорларга-ку қиргин келганига анча бўлди. Кўчанингни икки ёни ё бетонлаб ташланган, ёки брусчатка ётқизилган. Кўкаламзорлаштириш учун бир қарич жой йўқ. Бир қадам бўш жой бўлса, нимадир қурилаётди.

Қонунлар ишламаса, қондалар назар-писанд қилинмаса, йўловчилар ҳуқуқлари поймол бўлаверса-ю, бекорга газеталар жар солиб тураверса?! На тартиб қолди, на инсоф...

Тошкент шаҳар прокуратураси ўз уйига “бегона бекат”лар бўйича урганиш ўтказиб, жамоат транспорти воситалари йўловчиларига муносиб шарт-шароит яратиш беришда амалий таъсир ўтказишига, айбдорларга қонуний чора қурилишини таъминлашига ишонасизми? Йўқ дедингизми? Биз эса барибир ишонгимиз келади. Чунки Давлатимиз раҳбари – Президентимиз шаҳар аҳолисига жамики қулайликлар яратиш борасида қатъий топшириқлар бермоқда. Зора, пойтахтимиз амалдорларига инсоф кириб, юқорида келтирилган хунук манзараларга ҳам эътибор қаратиб қолсалар!

Мухаммад КЕНЖАБОВ,
журналист.

✓ ҚУТЛОВ

ЎЗБЕКИСТОН ДАВЛАТ ХОРЕОГРАФИЯ АКАДЕМИЯСИ ЖАМОАСИ

барча ватандошларимизни, шу жумладан,
Академия профессор-ўқитувчилари,
талаба-ёшларни яқинлашиб келаётган
бахор ва янгилаш байрами –

НАВРЎЗ

билан табриклайди.

Юртимиз тинч, фаровон, осмонимиз ҳамиша
мусаффо бўлсин!

Шу муборак рўзи Рамазон ойидаги қилинаётган
ибодатлар савоби-самараларини Яратганнинг Ўзи
барча юртдошларимизга ато этсин!



УРГАНЧ ДАВЛАТ УНИВЕРСИТЕТИ ЖАМОАСИ



Юртдошларимизни Рамазон
ойининг ушбу шукуҳли кунларида
кириб келаётган гўзаллик ва
нафосат айёми –
Наврўзи олам
билан самимий қутлайди!
Хонадонларингизга байрам
нафаси билан зиё нурлари ҳам
кириб борсин!



